

إِنَّ الدِّينَ عِنْدَ اللَّهِ الْإِسْلَامُ



لَا إِلَهَ إِلَّا اللَّهُ مُحَمَّدٌ رَّسُولُ اللَّهِ

# Khutba Jummah

HADHRAT MUHYI-UD-DIN AL-KHALIFATULLAH

*Munir Ahmad Azim*

24 Novembre 2017

(05 Rabi'ul Awwal 1439 AH)

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor « *Liqa: Relation Personnel entre l'homme et Allah* »:

Ene fois, ene kikaine fine demande le Saint Prophète de l'islam Hazrat Muhammad (saws): **Kan le Jour du Jugement pou arriver?** Le Saint Prophète (saws) fine réponde sa dimoune là, **bé ki préparation ki li fine faire pour sa (jour là)?**

Sa ti en effet ene réponse affectueuse ki le Saint Prophète Hazrat Muhammad (saws) fine fer et ki ena ene sens profond. Dimounes bizin préoccupe zot davantage pou prépare zot pour sa jour là au lieu pou imaginer kan sa Jour du Jugement là pou vini. Zot tous pou bizin ene jour paraître devant Bondié (Allah). A ce moment là, ki préparation ou fine fini faire dans sa le monde là pour rencontre Allah? Céki mo pé rode dire, c'est ki ene dimoune bizin établir ene communion avec Allah dans sa monde là en développant ene relation spirituelle et personnelle avec Li. Sa c'est pas ene contact momentané ou bref avec Allah, couma dire c'est seulement ene rencontre temporaire ki ou habituer ena avec ene camarade. Non! Li ene relation continuel et permanent avec Allah. L'état de la relation personnelle avec Allah implique ene connexion continuel et progressif avec Li. Na pas ena retour en arrière dans sa l'étape ou décision ki ou fine prend là.

Ene fois ene philosophe cynique fine demande le Musleh Ma'ud et Khalifatul Massih II, Hazrat Mirza Bashir-ud-Din Mahmood Ahmad (ra) à propos so l'opinion concernant ene dimoune ki fine arrive à so destination dans ene bateau mais ki ensuite contigne reste assizé dans bateau là (et pas déssane)?

Li fine réponne ki si l'océan ti ena ene la fin, alors li ti pou stupide de so part pou reste assizé dans bateau là, mais si l'océan pas ena aucaine la fin, alors celui ki pou déssane de bateau là pou certainement noyer. En d'autres mot, li pou ene désastre complet si ene kikaine tourne lédos avec Allah après ki li fine percevoir l'existence d'Allah. Sa dimoune là pou ruiné. Si ene kikaine développe ene relation progressif et spirituelle avec Bondié, li pou témoigne So manifestation dans la vie future aussi. Dans la vie à venir, la relation avec Allah li susceptible pou être illuminée des milliers de fois et vine bien pli brillant, et sa pour la récompense d'ene relation vivant ki ene dimoune fine ena avec Allah dans sa vie ici-bas là. Li pou paraîte comme si li pé deboute devant Allah mais, malgré sa, la relation avec Allah ki ene dimoune ordinaire ena, li pâli en comparaison avec le niveau ki le Saint Prophète, Hazrat Muhammad (saws) fine atteindre.

Quelle que soit la capacité ki Allah fine créé dans l'homme, Li fine permette au Saint Prophète (saws) pou atteindre so limite maximale. Sa c'est pas toutefois la limite d'Allah mais plutôt le commencement. Allah Li ene Être infini. Malgré ki kalité saint ou pieux ene philosophe capave été, l'émerveillement d'Allah dépasse l'imagination. Beaucoup kitchoses capave être imaginé sans l'expérience mais ena aussi beaucoup de choses ki pas capave être connu sans l'expérience. C'est possible pou ene dimoune ki li gagne ene expérience personnelle avec Allah d'après so capacité, n'importe kot sa-sa li été et dans tous bane directions. Sa nécessite ene réflexion plus profonde. La signification d'Allah ki Li partout c'est ki n'importe kot sa-sa ki ene dimoune capave guetter, dans n'importe ki direction et dans n'importe ki façon ki li capave penser, l'existence et la présence d'Allah li bel et bien apparent.

*Liqa* c'est ene l'état de relation personnelle avec Allah, avec ene sentiment de plénitude et de compréhension complet ki ene adorateur d'Allah ena avec Allah et vice versa. Faudé pas nous oublier ki parmi bane dimounes ordinaire même, li pas facile du tout pou établir ene relation durable. Bane dimounes reste souvent étrangers après ki zot fine rencontre zot camarades. Certains dimounes pas capave même reconnaîte les autres à cause d'ene la vue ki défectueux (c'est-à-dire, à cause ene mauvais la vue). Zot vivre zot la vie parmi bane dimounes sans ki zot capave toutefois trouve zot. Parfois, nous capave penser ki nous conne bane dimounes bien, mais c'est seulement avec le temps ki sa bane dimounes là zot bane bons et mauvais points vine clairs pour nous.

Bane madames bien souvent pas conne zot missiés bien et vice versa. Beaucoup madames souffert en rendant service à zot bane maris. Zot dévoué zot à zot maris et zot penser ki zot maris bien souvent oublier zot bane bons qualités ou sois zot (c'est-à-dire, bane maris là) pas prend sa (bane bons qualités là) du tout en considération. Bane ki pas développe bane sentiments pli raffiné et bane bons goûts et bane ki durs (envers les autres) pas pou capave conne ou expérience Allah même pendant le mois sacré de Ramadhan malgré ki zot pé garde *Roza*. **Ene kikaine pas pou capave jouir ene expérience spirituel avec Allah si li pas fer ene changement pour le meilleur dans li-même. Nous bizin fer zéffore pou trouve et expérience Allah.** Au début, sa contact avec Allah là li pou faire à ene niveau inférieur, mais kot sa pou suscite toutefois ene désir d'ene contact avec Allah ki pli profond et kot dimoune là envie expérience Allah, kot li envie ki Allah manifester Li à li.

Bane premiers l'étapes de la reconnaissance divine zot superficielles parski zot capave être acquis à travers bane raisonnement et déduction intelligents seulement dépi bane signes et bane merveilles ki trouve dans l'univers. Allah dire dans Quran Shareef: **Dans la création de bane les ciels et la terre et dans l'alternance de la nuit et du jour, ena en effet bane signes pour bane dimounes ki réfléchi.** (Al-Imran 3: 191).

Ena certainement bane signes divines dans changement du jour et de la nuit et dans changement de bane saisons; mais sa bane signes divines là zot discerné (zot vine apparent) zis par bane ki intelligents, bane ki, kan zot trouve sa grand mécanisme divine en opération, zot mazine Allah. Zot pas zis mazine Allah pendant bane *Namaz (Salat)* ki fine prescrit (et ki obligatoires), mais aussi tous les temps et dans tous circonstances. Sa pratique pou rappelle Allah dans tous situations li vine naturellement pou zot couma de l'eau ki couler sans aucaine zéffore ou la lutte. Sa vine pou zot couma ene l'habitude naturelle. Alors ene kikaine bizin habituer li pou guette l'œuvre et bane attributs d'Allah dans so l'environnement, kot à travers sa, so souvenir d'Allah pou augmenter. Ena aussi l'étude intérieure de soi-même parski kan nous commence prend conscience de nous l'âme, nous pou trouve Allah. A ce propos, ena plusieurs bane types d'études. Ena là-dans c'est l'étude du corps humain. Pli nous étudié nous le corps, le corps humain, pli nous pou faire bane découvertes extraordinaires. Nous capave gagne ene aperçu d'Allah dans sak particule de sa le corps là.

Eski zot fine fini comprend le fonctionnement du corps humain et eski zot fine pense lor saki li été réellement? Eski la conscience du « moi » li le résultat de la physique ou de la chimie? Ki été le « moi »? Ki faire ene kikaine bizin souffert, ki faire li bizin expérience la douleur? Sa c'est bane questions ki nous bizin réponne. Mo pou réponne en demandant

ki la loi physique faire ki nous senti nous malheureux kan ene dimoune guette nous avec ene regard de colère ou nous ressenti contentement et plaisir kan nous recevoir lors nous ene regard d'amour? Si sakaine d'entre nous commence réfléchi lor so moi intérieur, nous pou trouver couma la main d'Allah travail dans ene façon merveilleux, extraordinaire. Couma bane liziés fine évolué? Allah fine donne nous ene kitchose ki bien pli meilleur ki ene camera parfait. Tous zot bane parties fine être crée ensam et non pas séparément. Li pas possible ki tout d'abord la rétine fine être créer sans but suivi par lentille liziés et ensuite bane muscles ki contrôle tous sa là; parski sans sa, lentille liziés là ti pou inutile, si sa bane muscles là arrête fonctionner. Ene kikaine pas pou capave trouver kan sa bane muscles là affaibli avec l'âge. Si nous pense bien lors là, nous forcé pou admettre ki derrière tous sa là bizin ena ene Créateur, parski ene kikaine pas pou capave être so propre créateur; li pas pou capave créer li-même.

Tout saki exister dans sa l'univers là pas capave exister dans ene façon accidentel. Bizin ena ene intelligence créatif, ene Créateur derrière tous sa là. Pli nous réfléchi profondément lors l'évolution, pli nous pou rende nous compte ki nannié pas fine paraître (exister) par li-même mais ki derrière tout sa là ena ene Super Intelligence, ene tel l'intelligence ki dépasse nous propre l'intelligence ki limité.

Ene kikaine capave gagne ene certain réalisation de l'existence d'Allah avec l'utilisation de so liziés physiques en témoignant de So bane signes. L'univers révèle l'omniprésence d'Allah tous les temps. Après avoir ki nous fine comprend le sujet de la communion personnelle et de la relation avec Allah, le premier pas ki nous bizin faire vers sa, c'est ki nous bizin développer en nous-même ene conscience ki Allah Li là, nous bizin conscient ki Allah Li partout, en nous, tout autour de nous. Nous bizin développe bane goûts pli raffiné en nous-mêmes afin ki nous capave expérience la présence d'Allah. Allah fine accorde l'homme ene vision spirituelle. Allah Li ene réalité vivant et intelligent et Li la source de tous bane la vie et de tous bane l'intelligence.

Le Saint Prophète (saws) fine expliqué ki *Liqā* li ene l'état kot nous ena ene relation spirituelle et personnelle avec Allah. Kan ene dimoune vine vers Bondié alors Allah aussi vine vers sa dimoune là; Si ene kikaine marche vers Allah, Allah galoupe vers sa dimoune là. Zis sa dimoune là en question ki ressenti ki Allah fine bouge vite et vine vers li. Tanque ki nous pas conscient de la présence d'Allah, nous pas pou capave gagne ene relation personnelle avec Li. Li pou seulement ene relation philosophique. Le Messie Promis Hazrat Mirza Ghulam Ahmad (as) fine dire ki nous pou capave parvenir à réalise l'existence d'Allah par l'intelligence, mais sans révélation nous pas pou capave jouir pleinement de la lumière. Si bane matérialistes ti observe avec (vrai) l'intelligence bane

signes universels d'Allah, zot pas ti pou affirmé ki (*Nawzobillah*) Allah fine mort! Zot même affirmer ki Li (Allah) ti capave déjà exister avant dans le passé mais ki Li népli exister astère là.

Prochain l'étape vers l'établissement d'ene relation avec Allah c'est ki nous bizin orne nous la caze intérieur (c'est-à-dire, nous lékaire, nous l'âme) avec bane vertus et bane valeurs morales ki nécessite ene l'attention constant pour l'avancement progressif. La beauté superficielle li pas suffisant. L'amour bizin profond. Ene kikaine bizin habille li, parer li, embellir li avec l'amour pour Allah, pareil couma ene la mariée ki pauvre, li paré li d'après so bane moyens ki li ena. Tout dimounes, selon zot capacité, bizin embellir zot spirituellement, kot sa pou attirer l'attention affectueuse d'Allah lors zot. Même dans bane premiers stades du développement spirituel, Allah manifeste Li-même. Allah béni donc tous bane ki faire zéffore pou développe ene relation personnelle avec Li. Avec la manifestation d'Allah, la réforme li toujours contigner.

Si ene kikaine pas éprouve la jouissance divine, li pou incapable pou avancer spirituellement et li risquer reculer et vine indifférent à ene la vie ki droite, ki pieuse, ki correcte. Pour ki nous rapproche nous d'Allah, li essentiel ki nous possède le désir pou vine de plus en plus purifié. Par conséquent, nous conduite personnelle envers bane épouses, maris, zenfants, bane parents, camarades et zot tout (en général) bizin être approprié. L'informalité ki vide de respect li ene poison mortel. Li détruire tous bane l'amitiés. Nous lire dans Quran Shareef:

**Muhammad li le messenger d'Allah. Et bane ki avec li zot dures contre bane mécréants (bane sans la foi), mais tendres entre zot-mêmes.** (Al-Fath 48: 30).

Sa verset là pé faire référence à la fermeté contre le *Kufr* (l'incroyance). Nous bizin faire ene zéffore conscient en nous rappelant ki nous, bane musulmans de la manifestation divine, du Vrai Islam, Jamaat Ul Sahih Al Islam, nous bizin accorde ene l'attention particulier à la bonne conduite tout au long de l'année, et nous bizin doubler et même tripler nous bane zéffore dans sak Ramadan ki nous pou témoigner dans nous la vie.

Zot tous bizin prier pour ki zot gagne la capacité pou développe ene relation permanent avec Allah et purifier zot lé cœur. Ena ene besoin absolu pou prête attention à nous propre purification ki pou permette nous pou témoigne de la présence et de la miséricorde d'Allah. Li possible ki ene kikaine capave ena bane manquements dans so bane zéffore, mais après avoir ki li atteindre ene certain niveau, faudé pas ki li relâche so bane zéffore. **Si li persévérer** après avoir ki li fine glissé de temps en temps, li pou fini



par atteindre so l'objectif. Li bizin contigner so la lutte spirituelle, même si sa la lutte là li amère et paraîte couma ene fardeau lourd, mais li bizin persévérer, li bizin persister pou accomplir sa bane actes bien amers là (tel ki: *Salat, Zikrullah, récite Darood Shareef, lire Quran Shareef, etc.*) parski après quelque temps sa l'amertume là pou disparaîte pour laisse place à la pure douceur spirituelle, à la douceur de la foi.

Par conséquent, persévérer dans bane actes d'adoration tout en plaçant zot confiance dans Allah, le Dieu Unique et Suprême et en comptant lors Li pour guéri ou de ou bane mauvais tendances, et alors Allah, Celui ki tende tout, zamais Li pou vine sourd à l'appel de So bane serviteurs sincères, bane ki fine péché contre zot propres l'âmes mais ki fine répenté suffisamment pour ki zot développe l'envie pou change zot la vie, pou réforme zot complètement et pou vine près avec Allah, pour ki zot vine parmi So bane serviteurs bien-aimés. En vérité, Allah content bane ki répenté et rattrape zot et rachète zot pour zot bane péchés passés et zot réforme zot la vie pour réfléchir le véritable Islam, vrai *Imaan* et pou vine complètement musulmans, à l'intérieur et à l'extérieur aussi. C'est céki tous bane membres du Jamaat Ul Sahih Al Islam bizin faire zéffore pou accompli. Ou pas parfait. Peut-être zot fine commette bane erreurs et bane péchés dans le passé, mais Allah fine choisir zot et fine ouvert pou zot la porte de la foi et du pardon en envoyant So Serviteur choisi, ene Professeur pour enseigne zot le chemin à prendre pour arrive ziska Li, sain et sauf; en sécurité et en faisant bane louanges d'Allah dans la joie. Bane ki prend le droit chemin après l'égarement et persévère dans vraie la foi, Allah pou élève zot à bane rangs bien haute (bane rangs ki principalement spirituels), que ce soit dans sa lé monde là et dans l'au-delà aussi.

Ki Allah accorde à bane membres du Jamaat Ul Sahih Al Islam ene véritable compréhension de la signification de *Liqā* et ki Allah accorde à zot tous ene relation durable et permanent avec Li. Pli zot vine pli près avec Allah et établir ene relation pli intime avec Li, pli la communauté (c'est-à-dire, Jamaat Ul Sahih Al Islam - **L'ISLAM**) pou gagne la capacité pour effectuer ene révolution spirituelle à travers le monde. Ki Allah donne nous sa pouvoir, sa capacité là pour réalise sa! *Ameen*.